

Gou Siengj Sou Vih Gou Bek Fwngz

我 需 要 掌 声

Gou yienznaeuz dwg lwgsai coeng-mingz, dwggayez ndeu. Hoeng, byawz liuh ndaej daengz, bi'gvaq ndwen-cieng, gou cuengq bauq seiz mbouj siujsim hawj aen da ndeu sieng vaih bae lo.

Daj neix hwnj, mboujlwnh gou siengj guh gijmaz, gyoengq lauxsae caeuq doengzhag cungj naeuz gou mbouj fuengbienh, mbouj hawj gou bae guh. Gij najsak hojlienzy gyoengqvunz, hawj gou saedcaih nanzsauh.

Haggeiz neix, ban dou daeuj boux lauxsae moq ndeu lo. Dangz go daih'it, lauxsae lij caengz byaij haeuj gyausiz, gou couh ngaem gyauej roengz, lau deng lauxsae moq raen naj gou. Hainduj hwnjdangz le, lauxsae moq heuh dou doxlwnz hwnj daiz bae gaisau bonjfaenh. Boux hwnj boux roengz, yaepda couh lwnz daengz gou lo. Gou lij dwg ngaem dwk gyauej mbouj ning, aenvih gou caen mbouj siengj hwnj daiz bae. Lauxsae moq ngamq daeuj dangyienzy mbouj rox gij saeh gou, raen gou yienghneix, laihnaeuz gou mbei saeq mbouj gamj hwnj daiz, couh mbouj dingz gujli gou hwnjbae. Mwhneix, ndawsim gou caen dwg gijmaz feihdauh cungj miz ha. Gou mbouj dwg mbei saeq, hoeng gou lau lauxsae moq hix naeuz gou mbouj fuengbienh, mbouj yungh guh gaisau. Lauxsae moq lij youq gizhaenx caenh-rengz coi gou, gou nyaenx mbouj ndaej raemxda conh lo.

Sing bek fwngz ndeu, mbouj rox



dwg byawz bek; benq sing bek fwngz riengz dwk yiengj hwnjdaej; doeklaeng dwg rangh sing bek fwngz lumj byajraez nei goksadsad. Gou ndwn hwnjdaej, lizhai aen dieгнаengh, byaij bae coh gyangjdaiz. Gij sing bek fwngz hix mbouj dingz, itcig riengz gou byaij daengz gyangjdaiz. Gou nyaenx dwk raemxda, simcingz gig gikdoengh, baenz aen cih baenz aen cih gangj sat gaisau.

Sing bek fwngz ndeu, benq sing bek fwngz ndeu, rangh sing bek fwngz ndeu lumj byajraez nei, youh riengz dwk gou ma daengz dieгнаengh, gou dauqdaej nyaenx mbouj ndaej lo, raemxda doek-yagyag, daej hwnjdaej lo.

Gou caen siengj doiq gyoengqvunz gangj, gou mbouj siengj sou hojlienzy gou, mbouj siengj, mbouj siengj saek di, gou siengj sou vih gou bek fwngz, vih gou bek fwngz.....

(bouxij Siujmingz bouxhoiz Ouh Caijfangh)

Gij Gyaundeiz Byada'gyozsanh



Byada'gyozsanh dwg Swhhih Yen gizdieg gingjsaek daih'it ndei. Gij gyaundeiz Byada'gyozsanh dwg: Faex gyaundeiz, rin geizheih.

Byaij haeuj bakdou Byada'gyozsanh, couh ndaej raen haujlai gocoengz geq bak bi haenx daengz ngaungau, miz mbangj mbawfaex heuyauyau, miz mbangj deng mwi bienq nding, ndawde miz go coengz geq ndeu, naengfaex lumj gyaeplungz nei raeuzrwd, cienznaeuz dwg Yivangz Dadi youzyawj Byada'gyozsanh seiz, byaij ndaej daengx ndang fathwngq, duet geu buhlungz venj youq gwnz gocoengz. Daj baezneix hwnj, go faexcoengz neix couh did ok gyaeplungz daeuj.

Gij rin Byada'gyozsanh gig mizyinx. Gij rinndaek Byada-gyozsanh yienghceij geizheih, miz mbangj lumj duzsaeceij doxrongx, miz mbangj lumj duzguk roengz bya, miz mbangj lumj duzungjcoz mbe fwed, miz mbangj lumj duzyiuh gvaengx mbin gwnzmbwn, miz mbangj lumj duzungqsou boemz youq henz daemz, caemhcaiq lij miz mbangj lumj daihvuengz cap youq gwnz bya langhda yawj seiqlengq.....

Gij raemxmboq Byada'gyozsanh liengzseuseu diemzsubsub. Diuzrij gwnz bya ngutngeuj, raemxmboq menhmenh daj gwnz lae daengz laj, gij sing raemx lae "dingdoeng dingdoeng", baez sang baez daemq, couh lumj gij sing aengimz ndei dingq raixcaix. Youq baihgvas Byada'gyozsanh miz congh mboqcij ndeu, raemxmboq sawdikdik lumj Hangzcouh Lungzcingj, seizdoeng mbouj hawq, seizhah mbouj roenx. Dingqny naeuz gonqseiz miz gij raemxmboq hau lumj raemxcij haenx byoq okdaej gvaq, ndigah ndaej gij mingz heuhguh "mboqcij". Miz fouq doiq ndeu haenx naeuz gvaq: "Ringaiq nyodcaz cungj naeuz feih bak, rij laeg raemxcij baez gwn diemzsub".

Byada'gyozsanh caen dwg gyaundeiz raixcaix! Gou gyaenz Byada'gyozsanh. (bouxij Ciz Gyah bouxhoiz Goenggen)

Haj

Moix ngoenz gou cungj rox di saeh gvendaengz aen singhgiuz Lwgvuengziq, gij saeh de lizhai aen singhgiuz de caeuq baeyouz daengj. Doengh gijneix cungj dwg caeuq de doxgangj ndaej rox. Couh yienghneix, daengz ngoenz daihsam, gou ndaej rox gij boihseiz faexceizlingz lo.

Mbatneix, youh dwg aenvih saehcingz duzyiengz, Lwgvuengziq lumjbaenz gig yousim dwk cam gou:

"Duzyiengz gwn faexcaz, deng lwi?"

"Dwg go, dwg caen go."

"O! Yienghneix ndei lai lo!"

Gou mbouj rox duzyiengz gwn faexcaz vihmaz youqgaenj baenzlai, hoeng Lwgvuengziq youh naeuz:

"Yienghde, duzyiengz caemh gwn faexceizlingz lwi?"

Gou lwnh Lwgvuengziq naeuz:

"Faexceizlingz mbouj dwg faexcaz bw, de dwg gofaex hung lumj aen'gyaudangz, couhsuenq daiq gyoengq ciengh ndeu dauqma, goj gwn mbouj liux go faexceizlingz ndeu."

Dwen daengz gyoengq ciengh, Lwgvuengziq cix riuhehe naeuz:


"Yienghde raeuz cix dawz gyoengq ciengh baenz duz baenz duz dab hwnjdaej."

Lwgvuengziq

小王子

bouxraiz Swng'ailgwzsuhbeilij bouxhoiz Luz Fwncangz

圣埃克苏佩里 著 卢奋长 译



De youh lumj gig rox nei naeuz:

"Faexceizlingz caengz maj hung, hix goj daemqdetdet bw."

"Dwg go. Hoeng mwngz vih maz hawj duzyiengz bae gwn faexlwg

faexceizlingz ne?

De han gou naeuz: "Ai! Gijneix lij yungh gangj ma?" De laihnaeuz mbouj gangj bouxboux cungj rox. Hoeng gou naemj gig nanz cij rox vihmaz.

Laixlawz, aen singhgiuz Lwgvuengziq youq haenx, goj lumj aen singhgiuz wngq ityiengh, miz nywj ndei caeuq nywj rwix; yienghneix hix miz cehnywj ndei caeuq cehnywj rwix, hoeng cehnywj yawj mbouj raen bw. Gyoengqde ninz youq ndaw namh, saek ngoenz miz saek naed ceh siengj ndiu daej, yienghneix de ietnonx, najmong dwk didngaz coh daeng-ngoenz.

Danghnaeuz de dwg ngaz laux-baeg roxnaeuz ngaz meizgveiq, cix caih de majhung.

Hoeng, danghnaeuz dwg doengh-go rwix, hawj vunz rox couh doq deng ciemz bae.

Aenvih youq aen singhgiuz Lwgvuengziq, miz mbangj ceh gig dwglau, neix couh dwg ceh faexceizlingz. Ndaw namh daengx aen singhgiuz de gizgiz cungj miz doenghgij ceh neix. Danghnaeuz mwngz mbouj ciemz faexlwg de bae vaiq di, couh caiq hix mbouj miz banhlap cawz bae lo. Gyoengqde couh maj doh daengx aen singhgiuz, gij rag gyoengqde couh ndonj haeuj lajnamh ndonj byoengq aen singhgiuz. Danghnaeuz aen singhgiuz neix iq lai, faexceizlingz youh lai, aen singhgiuz neix couh deng ragfaex ndonj dek ndonj byoengq bae.

"Youq biengz dou, gou deng guh ndei doenghgij neix bae," Lwgvuengziq naeuz gou nyi, "ngoenz-ngoenz gyanghaet, riengx bak swiq naj dajcang ndei le, couh deng bae baet aensinghgiuz seuqsaw bae. Aenvih faexlwg faexceizlingz caeuq faexlwg meizgveiq doxlumj, baez yawj ndaej ok go lawz dwg faexceizlingz, couh sikhaek ciemz de bae. Guh hong neix mbwq raixcaix, hoeng goj ngaih raixcaix." (6)